




# ხაშურის მოახბა



№35(359)

26 სექტემბერი, ორშაბათი,

2022 წელი

## ქინძათის ახალი სკოლა საზეიმოდ გაიხსნა

ხაშურის მუნიციპალიტეტის მერმა თენგიზ ჩიტიაშვილმა და მუნიციპალიტეტის საკრებულოს თავმჯდომარე ნინო ლიპარტელიანმა სოფელ ქინძათის საჯარო სკოლის გახსნის საზეიმო ცერემონიაში მიიღეს მონაწილეობა.

სოფელ ქინძათის საჯარო სკოლის შენობა საქართველოს მუნიციპალური განვითარების ფონდის მხარდაჭერით აშენდა. სკოლა ოთხ სოფელს - ქინძათს, მცხეთიჯვარს, ახალუბანსა და დუმაცხოვს (100 მოსწავლეს) მოემსახურება. სკოლა აღჭურვილია თანამედროვე კაბინეტებით, სპორტული მოედნით, სველი წერტილებით, გათბობის სისტემით და ადაპტირებული ინფრასტრუქტურით.

გახსნის ცერემონიას დაესწრნენ მუნიციპალიტეტის საკრებულოს თავმჯდომარე ნინო ლიპარტელიანი, თავმჯდომარის მოადგილეები ლევან გამრეკელი და ნოდარ ლომიძე, ხაშურის საგანმანათლებლო რესურს ცენტრის ხელმძღვანელი ზვიად გოგუაძე, საქართველოს მუნიციპალური განვითარების ფონდის წარმომადგენელი ქეთი ქადაგიშვილი, სკოლის ხელმძღვანელები, პედაგოგები, მოსწავლეები და მათი მშობლები.

მისასალმებელ სიტყვაში თენგიზ ჩიტიაშვილმა ხაზი გაუსვა სახელმწიფო პოლიტიკას განათლების მიმართულებით და აღნიშნა, რომ სოფლად მოქალაქეთა საცხოვრებელი პირობების გაუმჯობესებისთვის გამართული სასკოლო ინფრასტრუქტურა უმნიშვნელოვანესია. მან მიულოცა სასკოლო საზოგადოებას ახალი სასწავლო წელი და წარმატებები უსურვა.

„მუნიციპალიტეტი მხარს დაუჭერს ყველა ინიციატივას, რაც მიმართული იქნება ქართული სოფლის გაძლიერებისკენ“, - განაცხადა მუნიციპალიტეტის საკრებულოს თავმჯდომარე ნინო ლიპარტელიანმა. მან იმედი გამოთქვა, რომ სკოლის ახალი შენობა ახალ სიცოცხლეს შეიძენს და არაერთი თაობის წინსვლას და განვითარებას მოემსახურება.

ზვიად გოგუაძემ მადლობა გადაუხადა სკოლის მშენებლობის

## პროგრამა - „კარგი მმართველობა ადგილობრივი განვითარებისთვის სამხრეთ კავკასიაში“ - გრძელდება

საქმეში ჩართულ ყველა მხარეს - მუნიციპალური განვითარების ფონდს, ხაშურის მუნიციპალიტეტს, სკოლის ხელმძღვანელობას და სოფლის საზოგადოებას სკოლის ახალი შენობა მიულოცა.

საქართველოს მუნიციპალური განვითარების ფონდის წარმომადგენელმა



ქეთი ქადაგიშვილმა აღნიშნა, რომ სკოლის შენობა ყველა თანამედროვე სტანდარტს აკმაყოფილებს და მზადაა სასწავლო პროცესის დასაწყებად.

ქინძათის სკოლა ახალ სასწავლო წელს 10 პირველკლასელით ეგებება. თითოეულმა მათგანმა საჩუქრად ბუკი მიიღო.

გერმანიის საერთაშორისო თანამშრომლობის საზოგადოების GIZ-ის მხარდაჭერით, პროგრამის „კარგი მმართველობა ადგილობრივი განვითარებისთვის სამხრეთ კავკასიაში“ ფარგლებში, ხაშურის მუნიციპალიტეტში სამუშაო შეხვედრები გრძელდება.

შეხვედრის მიზანი, მუნიციპალური სამოქალაქო საზოგადოებისა და კერძო სექტორის გააქტიურებაა, ეკონომიკური, სოციალური და გარემოსდაცვითი საკითხების გაუმჯობესების მიზნით.

მუნიციპალიტეტის ადმინისტრაციულ შენობაში გამართულ შეხვედრას უძღვებოდა GIZ-ის ლოკალიზაციის ხელშეწყობის პროექტის წარმომადგენელი ნიკა ჩანადირი.

ხაშურის მუნიციპალიტეტის საკრებულოს თავმჯდომარე ნინო ლიპარტელიანმა, ხაშურის მუნიციპალიტეტში, მდგრადი განვითარების მიმართულებით განხორციელებულ ღონისძიებებზე და იმ 17 მიზანზე ისაუბრა, რომლებიც გაეროს გენერალური ასამბლეის რეზოლუციითაა გაწერილი და რომელთა შესრულებასაც მუნიციპალიტეტი, კომპეტენციის ფარგლებში, ეტაპობრივად ახორციელებს.

შეხვედრას ესწრებოდნენ მუნიციპალიტეტის მერიის, საკრებულოს, საგანმანათლებლო სისტემების, კეთილდღეობისა და განვითარების ცენტრის, ა(ა)იპ და სხვადასხვა ორგანიზაციის წარმომადგენლები, რათა მდგრადი განვითარების მიზნებთან დაკავშირებული ინფორმაცია უფრო ფართო მასშტაბისთვის გახდეს ცნობილი.



## ხაშურის ამერიკული სივრცე მომავალ ლიდერთა გაცვლითი პროგრამის (FLEX) მონაწილეებს მასპინძლობდა

FLEX პროგრამის 2021-2022 წლის ხაშურელმა ალუმნებმა მარიამ ლომიძემ, ნუცა გელაშვილმა და გელა გაჩეჩილაძემ შეხვედრის მონაწილეებს პროგრამაში მონაწილეობის კრიტერიუმები გააცნეს, სარეგისტრაციო პროცედურები განიხილეს და ამერიკის შეერთებულ შტატებში სწავლისა და ცხოვრების პერიოდში მიღებული გამოცდილება გაუზიარეს.

შეხვედრის ბოლოს FLEX-ის მონაწილეებმა აუდიტორიის შეკითხვებსაც უპასუხეს. პროგრამაში მონაწილეობის შესარჩევი პროცესი - აპლიკაციების მიღება დაწყებულია, შესაბამისად, შეხვედრის ახალგაზრდა მონაწილეებმა დეტალური ინფორმაცია მიიღეს მათთვის საინტერესო ყველა პროცედურასთან თუ სხვა საკითხთან დაკავშირებით.

შეხვედრაზე ხაზგასმით აღინიშნა ამერიკული სივრცეების როლი ახალგაზრდების პიროვნული განვითარების საქმეში.



### ა(ა)ი.პ „ხაშურსერვისის“ მიერ 2022 წლის რვა თვეში გაწეული მუშაობის ანგარიში და საფინანსო-ეკონომიკური მაჩვენებლები

ხაშურის მუნიციპალიტეტის საკრებულოს განკარგულებით, ხაშურის მუნიციპალიტეტის დასახლებებში, ქალაქისა და სოფლის ზონების დასუფთავებისა და სანიტარული ღონისძიებების, საგზაო ინფრასტრუქტურის, გარე განათების მოვლა-პატრონობის და წყლის სისტემის ზედამხედველობის, სასაფლაოს მოწყობისა და მოვლა-პატრონობის ღონისძიებების, მუნიციპალიტეტის დასახლებაში გამწვანების, მწვანე ნარგავების, სპორტული მოედნებისა და სკვერების მოვლა-შენახვის მიზნით გათვალისწინებული პროგრამის განხორციელებისათვის ადგილობრივი ბიუჯეტიდან, 2022 წლისთვის,

	ხელფასი	საქონელი და მომსახურება	სულ საფინანსება
1 დასუფთავება და სანიტარული ღონისძიებები	661866	383334	1045200
2 ხაშურის მუნიციპალიტეტის გარე განათება	84348	223352	307700
3 ხაშურის მუნიციპალიტეტის შიდა გზების მოვლა-პატრონობა	139416	148384	287800
4 წყლის სისტემის ზედამხედველობა	60600	37200	97800
5 გამწვანების პროგრამა	161634	109266	270900
6 სასაფლაოს მოვლა-პატრონობისა და სარიტუალო მომსახურების გაუმჯობესების პროგრამა	42780	15020	57800
<b>ჯამი</b>	<b>1150644</b>	<b>916556</b>	<b>2067200</b>

გამოიყო 2 067 200 ლარის სუფსიდი.(დაფინანსება).

2022 წლის რვა თვეში, ა(ა)ი.პ „ხაშურსერვისმა“ ხაშურის მუნიციპალიტეტის საკრებულოს მიერ დამტკიცებული პროგრამით გათვალისწინებული საქმიანობისათვის, ადგილობრივი ბიუჯეტიდან მიიღო 1 378 921,5 ლარი, ხოლო საკუთარი შემოსავლებიდან მიღებული და გახარჯული იქნა 67056,49 ლარი. სულ რვა თვის დანახარჯებმა შეადგინა 1 445 977,99 ლარი. საიდანაც ხელფასის დანახარჯებმა შეადგინა 731831,53 ლარმა, ხოლო საქონელი და მომსახურების ხარჯმა შეადგინა 714 146,46 ლარი. პროგრამით გათვალისწინებული დავალებების შესასრულებლად, ა(ა)ი.პ ხაშურსერვისის მიერ, ჩატარებული იქნა ტენდერები, კონსოლიდირებული ტენდერით მომწოდებლებთან გაფორმებული იქნა 12 ხელშეკრულება თანხით 476371 ლარი, ჩატარდა 11 ელექტრო ტენდერი - თანხით 334545 ლარის. მომწოდებლებთან გამარტივებული შესყიდვის წესით გაფორმდა 45 ხელშეკრულება, თანხით 66439,2 ლარის. სულ, რვა თვეში, საქონლისა და მომსახურების შესყიდვაზე გაფორმებული ხელშეკრულებების ღირებულებამ შეადგინა 877355,2 ლარი.

რვა თვეში შეძენილი იქნა 462817,47 ლარის საწვავი. მათ შორის: 93315ლიტრი დიზელის საწვავი, თანხით 341401,43 ლარი, 8457 ლიტრი ბენზინი, თანხით 29083,23 ლარის და 66711 კმ ბუნებრივი გაზი - თანხით 92332,81 ლარის. რვა თვეში კომუნალური გადასახადების დანახარჯებმა შეადგინა 10098,45 ლარი მათ შორის: სატელეფონო მომსახურება და ინტერნეტის დანახარჯია (სილქნეტი + მაგთი) 3468,83 ლარი, გათბობისათვის გახარჯული გაზის ღირებულება-4483,16 ლარი, გახარჯული ელექტრო ენერჯის ღირებულება-2146,46 ლარი. თანამშრომლებისათვის შეძენილი იქნა 10000 ცალი სამედიცინო პირბადე - თანხით 690 ლარი. ჩვენს ქვეყანაში, ეროვნული ვალუტის ინფლაციამ, გამოიწვია საქონელის შესყიდვაზე დაგეგმილი ფასების მნიშვნელოვანი ზრდა.

ხაშურის მუნიციპალიტეტის დასახლებებში ქალაქისა და სოფლის ზონების დასუფთავებისა და სანიტარული ღონისძიებების პროგრამის განხორციელებისათვის ადგილობრივი ბიუჯეტიდან გამოყოფილი იქნა 1045200 ლარი, საიდანაც ხელფასის ფონდი შეადგენს 657 996 ლარს, ხოლო საქონელი და მომსახურების მუხლი განისაზღვრა 387 204 ლარით. დასუფთავების პროგრამის შესრულებაზე დასაქმებულია 125 თანამშრომელი. ერთი მენეჯერი, 5 სპეციალისტი, 4 მუშა-ბრიგადირი, 38 მეეზოვე, 32 მუშა, 22 დასუფთავების ქვითრების დამრიგებელი, 6 დამლაგებელი, 13 მძღოლი. დასუფთავების პროგრამის შესასრულებლად მუნიციპალიტეტის ტერიტორიაზე განთავსებულია 1100 ლიტრიანი 796 ცალი ნაგვის კონტეინერი ( 298 ცალი პლასტმასი, 498 ცალი რკინის) , გამოიყენება ექვსი ერთეული ნაგავშემკრები სპეცტექნიკა და ხუთი სატვირთო ავტომანქანა. ყოველდღიურად ქ.ხაშურში იგვება 48100 მ<sup>2</sup>.

ხოლო დაბა სურამში 15500 მ<sup>2</sup> ფართი. თვეში ერთხელ ვახორციელებთ ქ.ხაშურში და დაბა სურამში საავტომობილო მაგისტრალის მიმდებარე ტერიტორიის დასუფთავება -გაწმენდას 638000 მ<sup>2</sup>- ზე. 2022 წლის რვა თვეში ხაშურის ნაგავსაყრელზე გატანილი იქნა 56480 მ<sup>3</sup> საყოფაცხოვრებო ნარჩენი. 2022 წელს დასუფთავების მუშების ყოველთვიური ხელფასი დარიცხვით შეადგენს 525 ლარს. მეეზოვეებსა და დასუფთავების ქვითრის დამრიგებლების ყოველთვიური ხელფასი დარიცხვით შეადგენს 320 ლარს, მძღოლების ხელფასი 500 ლარს. 2022 წლის რვა თვეში ადგილობრივი ბიუჯეტიდან დასუფთავების პროგრამის შესასრულებლად მიღებული იქნა 753 152,06 ლარი . ადგილობრივი შემოსავლებიდან მიღებული იქნა 44800 ლარი.

ხაშურის მუნიციპალიტეტის დასახლებებში გარე განათების სისტემის მოვლა- შენახვასა და რეაბილიტაციაზე, ადგილობრივი ბიუჯეტიდან, 2022 წლის პროგრამით გათვალისწინებული სამუშაოებისათვის, გამოყოფილია 307 700 ლარი.საიდანაც ხელფასის ფონდი შეადგენს 84 348 ლარს,ხოლო საქონელი და მომსახურების მუხლი განისაზღვრა 223 352 ლარით. გარე განათების ელექტრო ხაზების სიგრძეა 405325 მეტრი. ელექტრო სადენების ბოძები განლაგებულია ყოველ 35 მეტრში და სულ აღირიცხება 11581 ელექტრო საყრდენი ბოძი და ამდენივე სანათი. 11581 ელექტრო საყრდენი ბოძიდან 10933 ბოძი არის ელქსელების საკუთრებაში,ხოლო 648 ბოძი მუნიციპალიტეტის საკუთრებაა. გარე განათების 11581 სანათიდან 3000 არის დიოდური სანათი, ხოლო დანარჩენი 8581 სანათი არის ჩვეულებრივი ვარვარა ნათურები. გარე განათების სისტემის მოვლა-შენახვასა და რეაბილიტაციაზე დასაქმებულია ცხრა თანამშრომელი: ერთი მენეჯერი. ერთი ბრიგადირი, ხუთი ელექტრიკოსი, ორი მძღოლი , რომლებიც ემსახურებიან ორ სპეცავტომანქანას (ამწეკალათს)

2022 წლის რვა თვეში, გარე განათებისათვის მოვლა-პატრონობისათვის, საჭირო მასალების შესაძენად ჩატარდა 2 ელექტრონული ტენდერი - თანხით 83695 ლარი. შეძენილი იქნა სხვადასხვა ამპერისა და ტიპის 5460 ცალი ნათურა და სხვადასხვა სახის ელექტრო საქონელი, რომლებიც გამოყენებული იქნა მუნიციპალიტეტის დასახლებებში არსებული გარე განათების სისტემის მოვლა-შენახვის სამუშაოების შესასრულებლად. 2022 წლის რვა თვეში, გარე განათების მოვლა შენახვასა და რეაბილიტაციაზე ადგილობრივი ბიუჯეტიდან გაიხარჯა 174639 ლარი,საკუთარი შემოსავლებიდან მასალების შეძენაზე გაიხარჯა 1098 ლარი.

ხაშურის მუნიციპალიტეტის შიდა გზების მოვლა-პატრონობაზე 2022 წელს ადგილობრივი ბიუჯეტიდან გამოყოფილი იქნა 287 800 ლარი, შიდა გზების მოვლა -პატრონობაზე დასაქმებულია ექვსი თანამშრომელი: ერთი მენეჯერი, ერთი გზის ინჟინერი, ოთხი მექანიზატორი, სამი ერთეული საგზაო ტექნიკა: გზის გრეიდერი, ექსკავატორ-დამტვირთი და მუხლუხიანი ტრაქტორი. ტენდერზე შეძენილი იქნა 300 კმ ხრეში და 1500 კმ ღორღი, რომელიც გამოიყენება მუნიციპალიტეტის შიდა გზების შეკეთებაზე. 2022 წლის რვა თვეში დაგრეიდერული და მოხრეშილი იქნა ხაშურის მუნიციპალიტეტში შემავალი 3500 კმ. შიდა გზები.

2022 წელს რვა თვეში შიდა გზების მოვლა-პატრონობისათვის, ადგილობრივი ბიუჯეტიდან მიღებული იქნა 245345,87 ლარი, ხოლო საკუთარი შემოსავლებიდან გახარჯული იქნა 12199 ლარი, სულ დანახარჯმა შეადგინა 257544,87 ლარი.

ხაშურის მუნიციპალიტეტის დასახლებაში გამწვანების, მწვანე ნარგავების, სპორტული მოედნებისა და სკვერების მოვლა-შენახვისათვის მუნიციპალიტეტის საკრებულოს მიერ 2022 წელს ადგილობრივი ბიუჯეტიდან გამოყოფილი იქნა 270900 ლარი, საიდანაც ხელფასის ფონდი შეადგენს 161 634 ლარს,ხოლო საქონელი და მომსახურების ფონდი 109266 ლარს. 2022 წლის რვა თვეში მიღებული იქნა 131 641,32 ლარი. ჩატარებული იქნა ერთი ელექტრო ტენდერი და შეძენილი 156 ძირი სხვადასხვა ჯიშისა მრავალწლიანი ხე მცენარეები, რომელთა ღირებულება შეადგენს 13700 ლარს. მუნიციპალიტეტის ტერიტორიის გამწვანების , მწვანე ნარგავების, სპორტული მოედნებისა და სკვერების მოვლა-შენახვაზე დასაქმებულია 25 თანამშრომელი.

მუნიციპალიტეტის დასახლებაში სასაფლაოების მოწყობისა და მოვლის ღონისძიებებზე, 2022 წლისათვის, ხაშურის მუნიციპალიტეტის საკრებულომ გამოყო 57800 ლარი. (ხელფასისათვი - 42780 ლარი,საქონელი და მომსახურებისათვი - 15020 ლარი) 2022 წლის რვა თვეში ადგილობრივი ბიუჯეტიდან მიღებული იქნა 25705,60 ლარი. 2022 წლის რვა თვეში სამარხი ორმოს(მიწის) გაჭრა - ამოვსებიდან მიღებულმა საკუთარმა შემოსავლებმა შეადგინა 9170 ლარი, საიდანაც მესაფლავეებზე ხელფასის სახით გაიცა 2862 ლარი, ხოლო დანარჩენი დარჩა ჩვენს ორგანიზაციაში საბრუნევი საშუალებების შესაძენად.

ხაშურის მუნიციპალიტეტის წყლის სათავე-ნაგებობების ზედამხედველობაზე 2022 წელს გამოყოფილი იქნა 97 800 ლარი, წყლის სათავე ნაგებობის ზედამხედველობაზე დასაქმებულია 13 კაცი, რომელთა ხელფასის ხარჯმა 2022 წლის რვა თვეში შეადგინა 40400 ლარი, შეძენილი წყლის გამწმენდი საშუალებების ღირებულებამ შეადგინა 13027 ლარმა.

2022 წლის ივლისის თვეში, ხაშურის მუნიციპალიტეტის მერის ბრძანებით, ჩვენს ორგანიზაციაში მოხდა რეორგანიზაცია. გამოგვეყო მწვანე ნარგავების მოვლა პატრონობისა და წყლის სისტემის ზედამხედველობის პროგრამით გათვალისწინებული სამუშაოები და გადაეცა ა(ა)ი.პ წყლისა და გამწვანების კომპანიას. ინფლაციის შედეგად გაძვირდა საწვავ-საცხ მასალები და სათადარიგო ნაწილები. აგვისტოს თვეში მუნიციპალიტეტიდან დამატებით გამოგვიყეს 150 000 ლარი. სანიტარული ღონისძიებებისათვის 100 000 ლარი, შიდა გზების მოვლა-პატრონობისათვის 50 000 ლარი.

ზ. ნოზაძე,  
ა(ა)ი.პ „ხაშურსერვისის“  
დირექტორი:

### ხაშურში, ჩქაროსნული ავტომაგისტრალიდან გაგარინის ქუჩამდე, მისასვლელი გზის რეაბილიტაცია მიმდინარეობს

„აღნიშნული ტერიტორია ქალაქს ცენტრალურ მაგისტრალთან აკავშირებს, შესაბამისად, გზის მოწესრიგება საჭირო და აუცილებელია. ამ ეტაპზე, მიმდინარეობს გზის მოწესრიგების სამუშაოები, პროექტის ფარგლებში დაიგება ასფალტის საფარი და სტანდარტების შესაბამისად მოეწყობა საგზაო ინფრასტრუქტურა.“ - აღნიშნა ხაშურის მუნიციპალიტეტის მერმა თენგიზ ჩიტიაშვილმა.

მერთან ერთად სამუშაოებს მერის მოადგილე ზვიად ქურდაძე გაეცნო. მისი განმარტებით, პროექტის ღირებულება, რომელსაც ადგილობრივი მუნიციპალიტეტი და რეგიონებში განსახორციელებელი პროექტების ფონდი ერთობლივად აფინანსებს, 1 151 597 ლარს შეადგენს.

გარდამავალ პროექტს, ტენდერში გამარჯვებული კომპანია „ჰედევ ჯორჯია“ ახორციელებს.



### რიკოთის მაგისტრალის მშენებლობა ვადაზე ადრე დასრულდება

ჩვენს ქვეყანაში დღეს რაც ხდება ინფრასტრუქტურის განვითარებასთან მიმართებაში, არის უპრეცედენტო, როგორც მასშტაბით, ისე შინაარსით. გვაქვს ტექნოლოგიურად ძალიან დატვირთული პროექტები, რომლებიც არა მხოლოდ ქვეყნისთვისაა უპრეცედენტო, არამედ ზოგიერთი მათგანი მსოფლიო მასშტაბითაც, - ამის შესახებ რეგიონული განვითარებისა და ინფრასტრუქტურის მინისტრმა ირაკლი ქარსელაძემ განაცხადა.

მინისტრის თქმით, პანდემიის პირობებში 70 კმ მაგისტრალური გზის გახსნა მოხერხდა და თბილისიდან ბათუმამდე ჩასვლა დღეს 5 საათის ნაცვლად უკვე 4 საათშია შესაძლებელი.

რეგიონული განვითარებისა და ინფრასტრუქტურის სამინისტროს ცნობით, აღმოსავლეთ-დასავლეთის მაგისტრალზე მიმდინარე და დაგეგმილი ყველა საგზაო მონაკვეთის მშენებლობის დასრულების შემდეგ, წითელი

ხიდიდან სარფამდე ჩასვლას 8 საათის ნაცვლად 4-4.5 საათი დასჭირდება და საგზაო ქსელის ასეთი განვითარების პირობებში, აღმოსავლეთ-დასავლეთის საერთაშორისო მაგისტრალის ე. წ. შუა დერეფანი კიდევ უფრო მიმზიდველი იქნება.

„შთამბეჭდავია აღმოსავლეთ-დასავლეთის ყველაზე გამომწვევი რიკოთის მონაკვეთის პროგრესი. 97 ხიდიდან სამუშაოები მიმდინარეობს 90 ხიდზე, 51 გვირაბიდან კი, ყველაზე. 32 გვირაბი უკვე გაჭრილია და ეს პროცესი გრძელდება. რიკოთის 4 მონაკვეთად ყველაზე კარგი პროგრესი ხევი-უბისა და უბისა-შორაპნის, ანუ ცენტრალურ მონაკვეთებზე გვაქვს, რომლის კონკრეტული ნაწილის გახსნას წელს ვგეგმავთ, ხოლო მთლიანად რიკოთის 52 კმ-იანი გზის დასრულება უკვე გაისად გვაქვს დაგეგმილი,“-განაცხადა ირაკლი ქარსელაძემ.



მინისტრმა სამტრედია-გრიგოლეთის გზის პროექტზეც ისაუბრა და აღნიშნა რომ პროექტის გამოწვევები საბოლოოდ გადალახულია. პროექტის პირველი და მეოთხე მონაკვეთის დასრულება დაგეგმილია წლის ბოლოს. მხოლოდ პირველი მონაკვეთის გახსნა კომესაძლებლობას იძლევა გვეკონდეს 86 კმ-იანი ჩქაროსნული მაგისტრალი. შესაბამისად, არგვეთას კვანძიდან, ზესტაფონიდან მაგისტრალით უკვე ლანჩხუთში ჩავალთ. რაც შეეხება მესამე მონაკვეთს, სატენდერო პროცედურები დასრულების ეტაპზეა.

„მთლიანობაში შეგვიძლია ვთქვათ, რომ ყველა პროექტის დასრულების შემდეგ, აღმოსავლეთ-დასავლეთის 460 კმ-იანი მაგისტრალი 30 კმ-ით შემცირდება და 430 კმ იქნება. აქედან, 219 კმ უკვე გახსნილია მოძრაობისათვის, 118 კმ-ზე კი, მიმდინარეობს სამუშაოები. სწორედ ეს არის ის 118 კმ, რომელიც, ფაქტობრივად, ყველა ძირითად მონაკვეთს მოიცავს. ჩვენი გეგმის მიხედვით, 2024 წლის ბოლომდე, უკვე ყველა ძირითადი მონაკვეთი იქნება გახსნილი,“- განაცხადა ირაკლი ქარსელაძემ.

### ახალგაზრდები გარემოს დაცვაზე ზრუნავენ

„იმოქმედე გარემოსთვის“ პროექტის ფარგლებში, ქალაქ ხაშურში, ორგანიზაცია „Let's Do It“ საქართველომ, ადგილობრივი ახალგაზრდების ჩართულობით, ღონისძიება მოაწყო. გარემოსდაცვითი თემატიკით მოიხატა ლიტვის სკვერში არსებული ფასადი და დასუფთავდა რკინიგზის სადგურის მიმდებარე ტერიტორია.

ჩატარდა ვიქტორინა და გამარჯვებულებს პრიზები გადაეცათ.

ღონისძიება, ხაშურის მუნიციპალიტეტის მერიის მხარდაჭერით, განათლების კულტურის, სპორტის სამსახურისა და ადგილობრივი რესურსცენტრის ორგანიზებით გაიმართა.

პროექტი, მსოფლიო დასუფთავების დღეს მიეძღვნა და მისი მთავარი გზავნილი გარემოზე ზრუნვაა.





# ნანა გელაშვილი: ჩემი წარმატებები ჩემი მოსწავლეების დამსახურებაა, ჩემი გამარჯვება - მათი გამარჯვებაა...

სსიპ ილია ჭავჭავაძის სახელობის ქალაქ ხაშურის მე-3 საჯარო სკოლის ინგლისური ენის მასწავლებელი ნანა გელაშვილი Fulbright Teaching Excellence and Achievement (TEA) and Fulbright Media Literacy Program, 2023 წლის შემოდგომის სეზონის მონაწილე გახდა.

პროგრამა ხორციელდებოდა ა.შ.შ-ს სახელმწიფო ბიუროს განათლების და კულტურული



საკითხების დეპარტამენტის და ორგანიზაცია IREX-ის მიერ. ამჟამად იგი მიემგზავრება ამერიკის შეერთებულ შტატებში, სადაც ექვსკვირიან დახელოვნების პროგრამას გაივლის ამერიკის მასკინტელ უნივერსიტეტში.

პროგრამის მთავარი მიზანია, ხელი შეუწყოს მსოფლიოს სხვადასხვა ქვეყნის

კულტურათათმორის დიალოგს და პედაგოგთა პროფესიულ ზრდას. პროგრამა სრულად ფინანსდება ამერიკის სახელმწიფო დეპარტამენტის მიერ. ჩვენ დავუკავშირდით ქალბატონ ნანას და გათავაზობთ მასთან ინტერვიუს დღევანდელ ნომერში:

- მცირე ბიოგრაფიული შტრიხები.... ჰობი, ინტერესები, მიზნები, თავისუფალი დროის რეალიზება....

- მე გახლავართ ნანა გელაშვილი. ილია ჭავჭავაძის სახელობის ქალაქ ხაშურის მე-3 საჯარო სკოლის ინგლისური ენის მასწავლებელი. ინგლისური ენის სიყვარული ბავშვობიდან მომყვება, სკოლაში ჩემი პედაგოგი ქალბატონი დარეჯან ჩოჩია გახლდათ. მან გააღვივა ჩემში ინგლისური ენისადმი ინტერესი და სიყვარული. სწორედ მისი დამსახურებაა, რომ უცხო ენის პედაგოგობა გადავწყვიტე. სიმართლე რომ გითხრათ, თავისუფალი დრო თითქმის არასდროს მაქვს. რაც შეეხება ჰობს- ფოტოგრაფია არის ჩემი ჰობი, არ მიფიქრია მასზე როგორც პროფესიაზე, თუმცა წლების მანძილზე ამით ვარ გატაცებული.

- ქალბატონო ნანა, გვიამბეთ კონკურსის შესახებ, რომელში მონაწილეობაც თქვენთვის წარმატებით დასრულდა...

- Fulbright TEA program გაცვლითი პროგრამა არაჩვეულებრივი შესაძლებლობაა პედაგოგებისთვის, რომელსაც ამერიკის შეერთებული შტატების საელჩო აცხადებს. გაცვლით პროგრამაში, ძირითადად, უცხო ენის (ინგლისური ენის), მათემატიკისა და საბუნებისმეტყველო მიმართულებების მასწავლებლებს შეუძლიათ მონაწილეობა. წელს მივიღე მონაწილეობა აღნიშნულ კონკურსში, სადაც მოვიპოვე გამარჯვება და შემარჩიეს ფულბრაიტის მასწავლებელთა დახელოვნების (Fulbright TEA) პროგრამის ფინანსისტად. აშშ-ის მასწავლებელთა დახელოვნების სახელმწიფო პროგრამით (TEA) გავემგზავრები ამერიკის შეერთებულ შტატებში, სადაც უნიკალური საშუალება მომეცემა, კიდევ მეტად განვითარდე და დახელოვნდე პროფესიული განხრით, გავიუმჯობესო სწავლების უნარ-ჩვევები და გავიდრმაგო ცოდნა ამერიკის შეერთებული შტატების შესახებ. სწავლების პერიოდში გვექნება სწავლების თანამედროვე მეთოდოლოგიების შესახებ სემინარები, სადაც ფართოდ გაშუქდება სასწავლო

კურიკულუმის განვითარება, გაკვეთილის დაგეგმვა და ინსტრუქციული მიდგომები.

გარდა ამ პროგრამისა, აქტიურად ვარ ჩართული საერთაშორისო სასკოლო საგანმანათლებლო პროექტებში, სადაც ვთანამშრომლობ ევროპის სხვადასხვა ქვეყნის პედაგოგებთან და ჩემს მოსწავლეებთან ერთად ვახორციელებ სასწავლო პროექტებს. რაც შეეხება პროფესიულ განვითარებას, აქტიურად ვარ ჩართული, როგორც ადგილობრივ ასევე საერთაშორისო ტრენინგებსა თუ ვებინარებში. 2018 წელს, პროგრამა eTwinning-ის ფარგლებში, წარგზავნილი ვიყავი აზერბაიჯანში, სადაც ვესწრებოდი კონტაქტურ სემინარს უცხოელ პედაგოგებთან ერთად. ხოლო 2019 წელს კი ავსტრიაში ქვენაში დავესწარი eTwinning-ის პროფესიული განვითარების სემინარს (PDW) "ციფრული კომპეტენციები და ინფორმაციული ტექნოლოგიების დიდაქტიკა". წარმატებული სასკოლო პროექტების განხორციელებისთვის, ჩემს მოსწავლეებთან ერთად, რამდენჯერმე დავჯილდოვდი მასწავლებელთა სახლის მიერ. ჩემი წარმატებები ჩემი მოსწავლეების დამსახურებაა, ჩემი გამარჯვება - მათი გამარჯვებაა.

- რამდენადაც ინფორმაცია გვაქვს, კონკურსის საერთაშორისო იყო, საქართველოს გარდა ვინ იყვნენ კონკურსის მონაწილე ქვეყნები?

- დიახ, ეს საერთაშორისო კონკურსია, სადაც მრავალი ქვეყნის მასწავლებელი იღებს მონაწილეობას, მათ შორისაა საქართველოც.

- უკვე ცნობილია, რომ მიემგზავრებით ამერიკაში. თუ შეიძლება, უფრო ვრცლად და კონკრეტულად ვიზიტის შესახებ, რა ღონისძიებები და სწავლებები იგეგმება პროგრამის ფარგლებში?

- შერჩეულ პედაგოგებს შესაძლებლობა ექნებათ აშშ-ში მონაწილეობა მიიღონ ყოველკვირეულ სემინარებში, პრეზენტაციებსა და დისკუსიებში, რომელიც გაიმართება მასპინძელ უნივერსიტეტში პროფესორ-მასწავლებლებისა და მოწვეული საგანმანათლებლო ექსპერტების ხელმძღვანელობით. Fulbright TEA Program-ითვალისწინებს აკადემიურ სემინარებს, რომლებიც ორიენტირებულია სწავლების ახალ მეთოდოლოგიაზე, ბავშვზე ორიენტირებულ სწავლებაზე, შინაარსზე დაფუძნებულ ინსტრუქციებზე, გაკვეთილის დაგეგმვასა და სასწავლო ტექნოლოგიების ტრენინგებზე და ასე შემდეგ.

- თქვენი მოლოდინები და თქვენი ფიქრები, რას მოგიტანთ პროგრამა პროფესიული განვითარების თვალსაზრისით?

- ჩემთვის, როგორც მასწავლებლისთვის, მნიშვნელოვანია მუდმივად სიახლეების ძიება, მე გავცანი ამ პროგრამის სასწავლო კომპონენტს, რომელიც მასწავლებლისთვის მნიშვნელოვანია, როგორც თეორიული ასევე პრაქტიკული თვალსაზრისით, პრაქტიკულ გამოცდილებას მივიღებ აშშ-ს მასპინძელი უნივერსიტეტის საშუალო სკოლაში, სადაც ადგილობრივ მასწავლებლებთან ერთად, ერთობლივად და დამოუკიდებლად ჩავატარებ გაკვეთილს და სკოლის ამერიკელ მოსწავლეებს გავაცნობ პრეზენტაციას საკუთარი ქვეყნების შესახებ. კურსის დასრულების შემდეგ, იქ შეძენილი ცოდნას და გამოცდილებას დავწვდები ჩემს სკოლაში და გავუზიარებ კოლეგებს.



- ოჯახი, სკოლა, მოსწავლეები, კონკურსები... საინტერესოა თქვენს შემთხვევაში როგორ უთავსებთ ამ ყველაფერს ერთმანეთს?

- დიდი გამოწვევაა, ყველაფერი მოასწრო, - იყო კარგი მასწავლებელი, განახორციელო პროექტები და თან ყურადღება არ მოაკლო ოჯახს. ამ ყველაფერს ოჯახის დახმარებით ვახერხებ. ჩემი ოჯახი ყოველთვის ინტერესდება ჩემი აქტივობებით მათი მხარდაჭერა მაძლიერებს, მაბედნიერებს და ათმაგად ვიხარჯები, რომ ვიყო წარმატებული და პროდუქტიული მასწავლებელი.

- იმედია, ამერიკიდან დაბრუნების შემდეგ, კიდევ შეგხვდებით და თქვენს შთაბეჭდილებებს და პროექტის შედეგებს გაგვიზიარებთ...

- სიამოვნებით!

თ. ახალკაცი

## ელიკო შუბითიძე - 62 წელი მოზარდთა აღზრდის საქმეში

სასწავლო წლის დაწყება ყოველთვის ასოცირდება ბავშვობის ტკბილ მოგონებებთან, მშობლიური, ძალზედ თბილი განცდაა, განსაკუთრებით როცა ჩაუვლი სკოლას რომელიც დაამთავრე ადგილსადაც სწავლის გარდა ათასი სისულელე მოგსვლია თავში და გიკეთებია კიდევ. მასწავლებლის



დანახვისას? აი ეს კიდევ სხვა ფენომენია, ათას მოგონებასთან ერთად მოწიწება და სიყვარული პირველია, რაც თავს შეგვახსენებს.

ქალბატონმა ელიკო შუბითიძემ 80 - ს გადააბიჯა, თუმცა ქალაქში მისი საქმიანი, ენერგიული ნაბიჯები თუ შეგინიშნავთ, ასაკს სულაც არ მიაქცევთ ყურადღებას. მისი ცხოვრების აქტიური რიტმი 1960 წლიდან დაიწყო, როცა ხაშურის

მუსიკალურ სკოლასა და 96 - ე საბავშვო ბაღში პედაგოგად დაიწყო მუშაობა. წლების განმავლობაში ქალბატონმა ელიკომ კარგად შეისწავლა უმცროსი თაობის აღზარდელთა საქროებები და შესაძლებლობები, დასასვენებლად წასულმა კურორტ სოჭიდან თავისი ხარჯებით შეიძინა მუსიკალური ინსტრუმენტები: ქსილოფონები, დოლი, არფა, მეტალოფონები და აი, 1975 წელს ხაშურში პირველი საბავშვო რიტმული ორკესტრიც ჩამოყალიბდა, რომელიც დღემდე არ კარგავს თავის როლს და აქტუალობას.

ქალბატონი ელიკოს ნოვატორული სვლები ამით არ შემოფარგლულა, 90 - იანებში კერძო საბავშვო ბაღი დააფუძნა, რომელმაც იმ რთულ პერიოდში ბევრ მშობელს შეუწყო ხელი ოჯახი სოციალურ - ეკონომიკური კრიზისისგან გადაერჩინა. მაღლიერი მშობლები (თავდაპირველად კონტიგენტი სულ 10 ბავშვით განისაზღვრა) დღემდე იხსენებენ, როგორ ამზადებდა თითოეული მშობელი ყოველდღე ახალ - ახალ, გემრიელ სადილს 10 პატარასთვის, როგორ მკაცრად ითხოვდა მასწავლებელი ჰიგიენის ნორმების დაცვას და ბავშვებს ზრდილობის ელემენტარულ წესებს როგორ უნერგავდა. ელიკო შუბითიძემ 60 - იანი წლებიდან მოყოლებული 62 წლიანი გამოცდილება დააგროვა, ის დღემდე მუშაობს და სხვაგვარად ვერც წარმოუდგენია.

დიახ, დღეს სკოლამდელ დაწესებულებებში სამუშაო პროცესი განახლდა. სიმბოლურია, თქვენი ყურადღება უზუცეს პედაგოგზე მიგვეპყრო, ვულოცავთ ელიკო შუბითიძეს სასწავლო პროცესის დაწყებას, სიმბხევეს, ჯანმრთელობას, იდეების სიუხვეს ვუსურვებთ.

ირინე გოცირიძე

# “ოქროს ფარის“ ოქროს ბავშვების ტრიუმფი თურქეთში

„თუ არ გინახავთ ქართული ცეკვა, ჩათვალეთ, რომ თქვენ საერთოდ არ იცით, რა არის ცეკვა. ეს არის სასწაული, ეს არის საოცრება, რომელსაც სიხარული, აღტაცება თუ გაოცება ერთად მოაქვს და სურვილი გიჩნდება, რომ არასოდეს დასრულდეს...“ ეს სიტყვები თურქეთის ქალაქ სოკეს მერს მუჰმედ



სპეციალურად რჩებოდნენ, რომ „ოქროს ფარის“ სცენური მშვენიერება ეხილათ.

მართლაც ბრავო „ოქროს ფარს“. ბრავო მათ ხელმძღვანელებს და ბრავო ამ შესანიშნავ ბავშვებს, რომლებმაც კიდევ ერთხელ აჩვენეს უზარმაზარ

თამაზობლუს ეკუთვნის, რომლის სპეციალური მიწვევით, ამ დღეებში, ჩვენი ქალაქის ფოლკლორული ანსამბლის „ოქროს ფარის“ ბავშვები აღნიშნულ ქალაქში, საერთაშორისო ფესტივალზე, მაცურებლის წინაშე წარსდგნენ. „წარსდგნენ“ აქ რბილად ნათქვამია, წარსდგნენ კი არა გადარიეს მთელი ქალაქი. იმდენად მოიხიბლნენ ჩვენი ბავშვების შემოქმედებით, პირველივე სადამოს, უკვე მეზობელი ქალაქის, გაზიანთეფის მერმა მიაკითხა და ლამის დაუჩოქა, ოღონდ არ წახვიდეთ, ჩემს ქალაქს ესტუმრეთ და იქაც გვაჩუქეთ ეს სიამოვნებაო. ანსამბლის ხელმძღვანელებმა, ქალბატონმა ნონა თედიაშვილმა და ბატონმა პაატა თედიაშვილმა ფრთხილად „შეაპარეს“ - იქ ამდენი



ბავშვით (დელეგაციის მთელი შემადგენლობა 60 კაცს ითვლიდა) სად მოვთავსდებითო. იმანაც - ხუთვარსკვლავიანი სასტუმრო გვაქვს დიდებულიო. ოღონდ თქვენ დაგვთანხმდით და სამი დღე მთელ ხარჯებს, კვებიანად, მე ვიღებ ჩემს თავზეო. (სულ უხეში გათვლითაც, საუბარი 25-30 ათას დოლარზეა. გ.გ.).



აუდიტორიას (კონცერტებს რამდენიმე სატელევიზიო არხი ლაივრეჟიმში აშუქებდა) ჩვენი ფოლკლორის საოცრება, რომელსაც მსოფლიოში ანალოგი არა ჰყავს!

გ. გოგოლაძე

## „დურუს“ თასის გათამაშება დასრულდა

ხაშურში ტრადიციული ტურნირი მინი ფეხბურთში მოყვარულთა შორის „დურუს თასი 2022“ დასრულდა. ტურნირი გარდაცვლილი ახალგაზრდა ფეხბურთელის - დავით გოჩიაშვილის სახელს ატარებს.

ფინალურ შეხვედრაში ერთმანეთს „ემტეესი“ და „Warriors“ დაუპირისპირდნენ. შეხვედრა გუნდმა „Warriors“ ანგარიშით 2:0 მოიგო და დურუს გარდამავალ თასს დაეუფლა.



მესამე ადგილზე გავიდა გუნდი „ჩვენებურები“. გამარჯვებულებს პრიზები და შესაბამისი სინჯის მედლები გადასცეს ხაშურის მუნიციპალიტეტის მერიის განათლების, კულტურისა და სპორტის სამსახურის ხელმძღვანელმა კონსტანტინე ფრუიძემ, სპორტის განყოფილების ხელმძღვანელმა ბესიკ გაჩეჩილაძემ, ხაშურის სასპორტო სკოლის დირექტორმა ივანე ხარაზიშვილმა და ვეტერანმა სპორტსმენებმა. დაჯილდოვდა ტურნირის საუკეთესო მეკარე გიორგი ლომიძე („Warriors“), რომელსაც ტურნირის განმავლობაში გოლი არ გაუშვია. მაცურებლის სიმპათიის პრიზი დაიმსახურა „ემტეესის“ ფეხბურთელმა ვანო მჭედლიშვილმა, ტურნირის საუკეთესო მოთამაშის პრიზი კი „Warriors“ ფეხბურთელ ნიკა იკაშვილს გადასცა დავით გოჩიაშვილის დედამ - ლეილა ახალკაცმა. დურუს გარდამავალი თასი გუნდის - „Warriors“ ფეხბურთელებს დავით გოჩიაშვილის მამამ - თენგიზ გოჩიაშვილმა გადასცა.

### იყიდება სასახლკარე ნაკვეთი

ხაშურში, იმერეთის ქუჩის მიმდებარედ, ე.წ. „სვანების“ მაღაზიის მეზობლად, სასწრაფოდ იყიდება სასახლკარე ნაკვეთი 8,9 მეასედი, მდინარე შოლას ნაპირზე.

ტელეფონი: 5 55 24 85 22

5 99 29 56 81

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი და გაზეთის რედაქტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.

E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.

რ-ით მონიშნული სტატია იბეჭდება დაკვეთით გაზეთი იბეჭდება თბილისში.